

本艸經疏卷十六

獸部上品

總二十種今疏其要者十種

龍骨

齒附

麝香

牛黃

熊脂

膽掌附

象牙

膽皮附

白膠

阿膠

牛乳

乳腐

肝

酥

龍骨味甘平微寒無毒主心腹鬼疰精物老魅欬逆洩痢膿血女子漏下癥瘕堅結小兒熱氣驚癇療心腹煩滿四肢枯痿汗出夜臥自驚恚怒伏氣在心下不得喘息腸癰內疽陰蝕止汗縮小便溺血養精神定魂魄安五藏白龍骨療夢寐洩精小便洩精齒主小兒大

人驚癇癲疾狂走心下結氣不能喘息諸瘕殺精物小兒五驚十二癇身熱不可近大人骨間寒熱又殺蠱毒得牛黃人參良畏石膏忌魚及鐵

[疏]龍稟陽氣以生而伏於陰爲東方之神乃陰中之陽鱗蟲之長神靈之物也故其骨味甘平氣微寒無毒內應乎肝入足厥陰少陽少陰兼入手少陰陽明經神也者兩精相合陰陽不測之謂也神則靈靈則能辟邪惡蠱毒魘魅之氣及心腹鬼疰精物老魅遇之則散也欬逆者陽虛而氣不歸元也氣得斂攝而歸元則欬逆自止其性瀋以止脫故能止洩痢膿血因於大腸虛而久不得止及女子漏下也小兒心肝

二臟虛則發熱熱則發驚癇驚氣入腹則心腹煩滿
歛攝二經之神氣而平之以清其熱則熱氣散而驚
癇及心腹煩滿皆自除也肝氣賊脾脾主四肢故四
肢痿枯肝寧則熱退而脾亦獲安故主之也汗者心
之液也心氣不收則汗出肝心腎三經虛則神魂不
安而自驚收斂三經之神氣則神魂自安氣得歸元
升降利而喘息自平汗自止也肝主怒肝氣獨盛則
善恚怒魂返乎肝則恚怒自除小腸爲心之腑膀胱
爲腎之腑二經之氣虛脫則小便多而不禁臟氣斂
則腑亦隨之故能縮小便及止夢寐洩精小便洩精
兼主溺血也其主養精神定魂魄安五臟者乃收攝

神魂閉滯精氣之極功也又主癥瘕堅結腸癰內疽陰蝕者以其能引所治之藥黏着於所患之處也

按龍骨入心腎腸胃龍齒單入肝心故骨兼有止瀉
滯精之用齒惟鎮驚安魂魄而已凡用龍骨先煎香
艸湯洗二度搗粉絹袋盛之用燕子一隻去腸肚安
袋於內懸井上面一宿取出研粉入補腎藥中其效
如神又法酒浸一宿焙乾研粉水飛三度用如急用
以酒煮焙乾或云凡入藥須水飛過曬乾每斤用黑
豆一斗煮一伏時曬乾用否則着人腸胃晚年作熱
也

主治參互

仲景方同牡蠣入柴胡桂枝各湯內取其收斂浮越之正氣固脫而鎮驚 同遠志等分爲末煉蜜丸如

梧子大硃砂爲衣每服三十丸蓮心湯下治勞心夢遺 梅師方睡卽洩精白龍骨四分韭子五合爲散空心酒服方寸匕 又方泄瀉不止白龍骨白石脂

等分爲末水丸梧子大紫蘇木瓜湯下量大人小兒用亦治久痢休息 姚和眾方久痢脫肛白龍骨粉

撲之 龍齒同荊芥澤蘭牡丹皮蘇木人參牛膝紅

花蒲黃當歸童便治產後惡血撲心妄語顛狂如傷寒發狂者切不可認作傷寒治誤則殺人 同牛黃

犀角鉤藤鉤丹砂生地黃茯神琥珀金箔竹瀝天竹

黃蘇合香治大人小兒驚癇癰疾

簡誤

龍骨味濇而主收斂凡洩痢腸澼及女子漏下崩中
溺血等證皆血熱積滯爲患法當通利疎泄不可便
用止濇之劑恐積滯瘀血在內反能爲害也惟久病
虛脫者不在所忌

麝香味辛溫無毒主辟惡氣殺鬼精物溫瘧蠱毒癰瘰
去三蟲療諸凶邪鬼氣中惡心腹暴痛脹急痞滿風毒
婦人難產墮胎去面蠅音孕目中膚翳久服除邪不夢寤

麝寐通神仙

忌大蒜

〔疏〕陶弘景云麝常食栢葉又噉蛇子以爲其香必非

因噉蛇而結蘇頌乃云夏月食蛇多至寒則香滿入
春臍內急痛自以爪剔出陶云五月得香往往有蛇
皮骨豈有食蛇逾一年而皮骨尙不化者乎不知麝
乃山獸好食香木芳艸如栢葉之類故其氣聚於臍
而結成是香或遇蛇亦噉但不結香耳如必噉蛇多
而後有香則此藥必大毒難近之物安得味辛氣溫
無毒耶甄權言苦辛其香芳烈爲通關利竅之上藥
凡邪氣着人淹伏不起則關竅閉塞辛香走竄自內
達外則毫毛骨節俱開邪從此而出故主辟惡氣殺
鬼精物凶邪蠱毒溫瘧中惡心腹暴痛脹急痞滿風
毒諸證也其主癰瘡者借其氣以達於病所也苦辛

能殺蟲故主去三蟲辛溫主散故能去面蠅及目中
膚翳性能開竅故主難產墮胎也走竄之性而云久
服除邪不夢寤魘寐通神仙者凡香皆能辟除惡氣
而通神明故有是功能也日華子云納子宮煖水臟
止冷帶疾藥性論主小兒驚癇客忤蝕一切癰疽膿
水今人又用以治中風中氣中惡痰厥猝仆兼入膏
藥傳藥皆取其通竅開經絡透肌骨之功耳

主治參互

同犀角牛黃琥珀龍齒遠志丹砂鉛丹金箔菖蒲眞
珠茯神天竺黃治心氣虛怯驚邪癲癇或夢寐紛紜
鬼交鬼疰及小兒急驚大人中惡等證 同白及白

歛紅白藥子雄黃烏雞骨煨乳香沒藥冰片爲末傅
一切癰疽疔腫有神 濟生方中風不省麝香二錢
研末入清油二兩和勻灌之卽甦 又方食諸果成
積傷脾作脹氣急用麝香一錢生桂末一兩飯和丸
菜豆大大人十五丸小兒七丸白湯下蓋果得麝卽
落木得桂卽枯故也 夏子益奇疾方口內肉毬根
如線五寸餘如釵股吐出乃能食物捻之則痛徹心
者麝香一錢研水服之日三自消 續千金方催生
易產麝香一錢水研服 經驗方鼠咬成瘡麝香封
之妙并治蠶咬成瘡

麝香走竄飛揚內透骨竅臟腑外徹皮肉及筋其性能射故善穿透開散東垣云凡風病在骨髓者用之使風邪得出若在肌肉用之反引風入骨丹溪云五臟之風不可用麝香以瀉衛氣二公之言誠得其旨矣凡似中風小兒慢脾風與夫陰陽虛竭發熱吐血盜汗自汗氣虛眩暈氣虛痰熱血虛痿弱血虛目翳心虛驚悸肝虛癰瘰產後血暈胎前氣厥諸證之屬於虛者法當補益槩勿施用卽如不得已欲借其開通關竅於一時亦宜少少用之勿令過劑甦省開通之後不可復用矣孕婦不宜佩帶勞怯人亦忌之李廷飛云不可近鼻有白蟲入腦患癰久帶其香透關

令人成異疾

牛黃味苦平有小毒主驚癇寒熱熱盛狂瘈除邪逐鬼
療小兒百病諸癇熱口不開大人狂癲又墮胎久服輕
身增年令人不忘

人參爲之使惡常
山畏牛膝乾漆

[疏]牛爲土畜其性甘平惟食百草其精華凝結爲黃
猶人身之有內丹也故能解百毒而消痰熱散心火
而療驚癇爲世神物諸藥莫及也凡牛生黃則夜視
其身有光皮毛潤澤眼如血色蓋得氣之精而形質
變化自有異也或云牛病乃生黃者非也本經味苦
氣平別錄有小毒吳普云無毒然必無毒者爲是入
足厥陰少陽手少陰經其主小兒驚癇寒熱熱盛口

不能開及大人癲狂癰瘡者皆肝心二經邪熱膠痰
爲病心熱則火自生焰肝熱則木自生風風火相搏
故發如上等證此藥味苦氣涼入二經而能除熱消
痰則風火息神魂清諸證自瘳矣鬼邪侵著因心虛
所致小兒百病多屬胎熱入心養神除熱解毒故悉
主之也性善通竅故能墮胎善除熱益心故能令人
不忘非久服多服之藥其云輕身延年者蓋指病去
則身自輕安而得盡其天年也

熱心主治參互

同犀角琥珀天竺黃鉤藤鈎朮神眞珠金箔麝香丹
砂治小兒驚癇百病 入外科內服藥能解疔腫癰

疽毒并可入傅藥止痛散毒如神 同犀角生地黃

牡丹皮竹葉麥門冬治小兒五色丹毒 同鍾乳石

眞珠猪牙皂角象牙末白殭蠶紅鉛片腦明礬沒藥

蛀竹屑天靈蓋爲丸土茯苓湯下治結毒有神 姚

和眾方小兒初生三日去驚邪辟惡氣以牛黃一豆

許以蜜少許研勻綿蘸令兒吮之一日令盡 外臺

秘要小兒七日口噤牛黃爲末以淡竹瀝化一字灌

之更以猪乳滴之 錢氏小兒方初生胎熱或身體

黃者以眞牛黃一豆大入蜜調膏乳汁化開時時滴

兒口中兼治腹痛夜啼 總微錄小兒熱驚或驚癇

嚼舌迷悶仰目牛黃一杏仁大竹瀝薑汁各一合和

勻與服 又方小兒積熱毛焦睡語欲發驚者牛黃
六分硃砂五錢同研以犀角磨汁調服一錢 王氏
痘癰方痘瘡黑陷牛黃二粒朱砂一分研末蜜浸臙
脂取汁調搽并可內服

簡誤

牛黃治小兒百病之聖藥蓋小兒稟純陽之氣其病
皆胎毒痰熱所生肝心二經所發此藥能化痰除熱
清心養肝有起死回生之力惟傷乳作瀉脾胃虛寒
者不當用

熊脂味甘微寒微溫無毒主風痺不仁筋急五藏腹中
積聚寒熱羸瘦頭瘍白禿面肝飽食飲吐嘔久服強志

不飢輕身長年

〔疏〕詩云惟熊惟羆男子之祥取其爲陽獸而強力壯毅也本經味甘氣微寒別錄微溫無毒其主風痺不仁筋急者蓋風爲陽邪熊爲陽獸其氣溫能通行經絡其性潤能滋養肝脾故主之也滑澤而通行故主五藏腹中積聚及食飲吐嘔甘寒而強力故能主寒熱羸瘦輕身性潤而疎風故能主頭瘍白禿面皴皯也久服強志不飢長年甚言其補虛壯筋骨之功耳熊掌乃八珍之一食之可禦風寒益氣力肉與脂同功河間云熊肉振羸是因其氣有餘以補不足者也○熊膽味苦寒無毒療時氣熱盛變爲黃疸暑月久痢

疳蠹心痛疰忤

藥性論小兒五疳殺蟲治惡瘡

〔疏〕熊膽氣味與象膽同其所主亦相似時氣熱盛變爲黃疸熱邪在足太陰也久痢疳蠹溼熱在手陽明也心痛疰忤熱邪在手少陰也入三經而除熱邪故能療諸證也極苦而寒故又能殺蟲治惡瘡點痔

主治參互

齊東野語赤目障翳熊膽丸以膽少許化開入片腦一二釐研勻點上絕妙 聖惠方小兒鼻蝕熊膽半分湯化抹之 外臺秘要十年痔瘡熊膽塗之神効一切方不及也或加入片腦少許以猪膽汁和塗亦妙 保幼大全諸疳羸瘦熊膽使君子末等分研勻